

Uunga siunnersuut: Naartunermi, erninermi meeravissartaarnermilu sulinngiffeqartarneq il.il. ullormusiaqartarnerlu pillugit Inatsisartut inatsisaat nr. xx, xx-imeersaq

(Isumaginninnermut Naalakkersuisoq)

Saqqummiussissut

(Isumaginninnermut Naalakkersuisoq)

Siullermeerinninneq.

Naartunermi, erninermi meeravissartaarnermilu sulinngiffeqartarneq il.il. ullormusiaqartarnerlu pillugit Inatsisartut inatsisaattut siunnersuut Naalakkersuisut sinnerlugit matumuuna saqqummiutissavara.

Naartunermi, erninermi meeravissartaarnermilu sulinngiffeqartarneq il.il. ullormusiaqartarnerlu pillugit Inatsisartut inatsisissaattut siunnersuutip matumani peqqussummi atuuttumi pingaarnertut tunngaviit ingerlateqqinneqarput. Aalajangersakkat pisariillisarneqarsimapput, oqaasertalersuinerlu erseqqinnerulluni. Peqqussummik allanngortiterineq taanna peqqussutip atuuttup qanoq paasineqarnissaanik apeqquteqarajuttarneq tunngavigalugu pisimavoq.

Manna tikillugu atuuttut pingaarnertut tunngavisoq tassaavoq sulinngiffeqarsinnaatitaanerup tamanut atuunera, ullormusiaqarsinnaatitaanerli isertitanik annaasaqarnermut attuumassuteqartinneqarluni. Inuit pineqartut taakkuupput, tassalu akissarsiaqarlutik sulisartut, namminersorlutik inuussutissarsiortut, namminersorlutik inuussutissarsiortut katissimallugit aappaat inooqataalluunniit namminersorluni inuussutissarsiortumut ikiortaasut, ilinniartut atuartullu.

Piffissat sulinngiffeqarfiusartut allanngortinneqarsimangillat.

Inatsisissat siunnersuummi matumani nutaartaasut tassaapput piffissamik sulinngiffeqarfiusumik kipititsisarneq pillugu malittarisassat, nalunaarsorneqarlutik inooqatigiit sulinngiffeqartarnerat ullormusiaqartarnerallu pillugit malittarisassat kiisalu meeravissartaartut aamma meeravissartaarnissaq siunertarlugu ilaqtariit meeqqanik paarsaqartut pillugit malittarisassat.

Piffissamik sulinngiffeqarfiusumik kipititsineq pillugu malittarisassat eqaannerulersinneqarsimapput. Angajoqqaat sulinngiffeqarnerminnik kipititsinngikkaluarlutik taamalu sulinngiffeqarnerup sinnera atorunnaarsinngikkaluarlugu ataatsimeersuarnernut, pikkorissarnernut, aalajangersimasunik sammisaqarluni ulluni aalajangersimasuni suliaqarnernut assigisaanullu suliamut attuumassuteqartunut peqataanissaminut inatsisissatut siunnersuutikkut periarfissaqalersinneqarput. Tamatuma pissuseqataa ilinniartunut atuuppoq, taakkumi siunnersuut tunngavigalugu atuartitsinermi annikinnerusumik peqataasinnaammata, piffissaq sulinngiffeqarfiusoq kipitinngikkaluarlugu sulinngiffeqarfissallu sinnera atorunnaarsinngikkaluarlugu. Allanguutip taassuma peqqussut ullutsinnut naleqqunnerusunngortippaa, angajoqqaallu periarfissaqalersillugit sammisani suliamut

tungasuni malinnaanissaannut, taamaalilluni piffissaq sulinngiffeqarfiusoq pineqartoq sulinngiffeqarfiunngitsoorsimasuuppat sulinngiffeqartup suliffimmini qaffariartornermigut ajornerusumik inissisimanissaa pisariaarullugu.

Inatsisissatut siunnersuut nalunaarsugaasumik inooqatigisap meeraanik meeravissiartaarnermi meeravissiartaartup meeqqap erniunerata kingornatigut sapaatit akunnerisa 15-it siulliit iluanni sapaatit akunnerini pingasuni erninermut atatillugu sulinngiffeqarsinnaatitaanera pillugu aalajangersakkamik imaqarpoq. Taamaattorli nalunaarsugaasumik inooqatigisap meeraanik meeravissiartaarnissamik qinnuteqaat aamma anaanaasup meeravissiartaarnissamik akuerinninnera kingusinnerpaamik meeqqap erniunerata nalaani tunniunneqareersimassapput.

Inatsisissatut siunnersuutikkut meeqqamik najugaqatiginngisaminnik meeravissiartaartut meeqqap angajoqqaaviisut sulinngiffeqarsinnaatitaalerlutillu ullormusiaqarsinnaatitaalerput. Meeravissiartaartut meeqqamik meeqqanilluunniit Kalaallit Nunaanni aallernerminnut atatillugu sapaatip akunnerani ataatsimi sulinngiffeqarsinnaatitaalerput, meerarlum meeqqalluunniit Kalaallit Nunaata avataanut aaneqassappata sapaatit akunnerini pingasuni sulinngiffeqarsinnaatitaalerlutik. Malittarisassat taakku meeravissiartaartut meeqqap angajoqqaaviinut naligitillugit inissippaat, taamaalilluni piffissaq meeqqamik aallernermut atorneqartoq tullerinneri malillugit sapaatit akunnerinit 15-init aamma sapaatit akunnerinit 19-init tiguneqartussaajunnaarsillugu.

Peqqussummi atuuttumi sulinngiffeqartitsisoqarsinnaanersoq taamaappallu qanoq sivistigisumik sulinngiffeqartitsisoqassanersoq kommunit naliliisussaallutillu aalajangiisussaapput.

Taamaattorli oqaatigineqassaaq aalajangersakkat taamaallaat meeravissiartaartunut imaluunniit meeravissiartaarnissaq siunertaralugu angajoqqaarsiassatut meeqqamik ilisarimasarerigarinnngisaminnik tiguisunut atuummata.

Taama oqaaseqarlunga siunnersuut Inatsisartunit akuersaarneqarluni suliarineqartussanngortippara.